

近代詩鈔

二十四

近代

詩

集

卷

一

上

近代詩鈔

黃 濬

濬字哲維號秋岳福建侯官人官財政部參事

石遺室詩話秋岳年幼劬學爲駢體文出語驚其長老
從余治說文時有心得世亂家貧舍去治官文書與同
學梁衆異朱芷青最稱莫逆相率爲五七言詩徧與一
時名下唱和惜久居都門不能多得江山助也

花朝後一日小秀野草堂雅集賦呈石遺夫子

羣植斂春陰簷牙夜氣沈花晨餘小雨酒病雜疏吟刻燭成何
促扶輪愧未任詩盟甯敢後雅意想遙岑

六月八日游農事試驗場歸拈今韻十一陌總一百六十
八字依次作詩以紀茲勝



羣居忽不樂驅車適西陌連闌蔽浮氛戴轍礙亂石園林赴望
眼重趼息遊客雲樓生遙青朝暉消野白坐令城市氣怳惚變
山澤昔年帝子居甲第逾侯伯陵谷殊蕭森慷慨追往迹道旁
田舍翁折柳拄荒宅當壚犢鼻褌甌盃羅几席雙驂旣戾止徒
御舍鞭策入門初縱眺松枌浴新碧廊腰抱複閣疑探小酉籍
紆路漸左轉甍眼見籬格芳草不礙人修葺資園役垣衣曳紺
翠爛縵若繡帛斜趨幽塘路恠石竦攢戟或蹲如怒猊或拱如
瑕璧逶迤各殊狀彷彿及水驛隔塘多稻田好風吹燕麥林開
露晴旭樹盡出山額盪舟牽湖菱解纜陟岸柏叩舷問漁具穿
蓮覓詩魄但知菡萏香豈識菰蒲積蜻蜓似解語點水故脉脉
鬧紅此一舸頓憶水國夕鼓枻比滄浪同舟疑太液安得倪黃
曹渲染入圖冊榜人發吳謳刺篙深兩尺葦多港益狹客舟纔

一隙微風動魚鱗水勢每洄逆回頭望荷塘卽此成疆畫小鯽
如穿梭戢戢倍數百卵育曾幾時隨港爲開闢浮萍無根株掩
映浪花赤逐波便團聚投漿暫辟易魚鳥忘天機曠觀怡骸革
沿溪游旣倦金碧見簷脊維舟傍石磴喜色動臧獲譬如樊籠
鳥奮迅快梳翮暢觀樓下路草色恣游屐茶軒分細乳樂事隨
吾適微吟或撫樹狂歌徑脫幘朱炎方張怒亭午暑更劇不辭
王仲祖七椀甘水厄臨牕矚飛棖一水淨錦積水中竦銅鳧項
脊芰荷隔茗苳已清冽瓜果更請益行經百步廊環樓樹堅柵
規模非不宏所歎意境窄賣籌以斂資有吏司稽核得金至菲
微胡爲窮刻覈致富豈無方徵斂及遊寫衙官小設施動以千
金擲私橐日纍纍彈効孰尸責措施盡顛倒乾坤宜裂圻么醜
奚足悲吾爲賢豪惜西邦有公園取法甯偏僻乃爲買櫝計而

有嗜痴癖弛弦當更張黜陟自羣辟匪惟戒獨樂實用遠便辟
長歌遂登樓鉅麗擬鳳掖鏡檻承珊瑚光輝照肘腋器寶欽弗
名梗概待申釋西琛貢新玉來自橫海舶南內傳舊珍金管紅
牙拍或繪耕織圖至理合探索或陳蜃膏燈寶異難備擇或列
宣德瓷古澤生波磔或屏觀稼畫牽牛服短輶電燈垂蓮房的
的似堪摘針神好身手仙子繡姑射天衣無微縫線絡那討繹
色相紛相乘心顏皆悅懌層層絢丹青森羅最廣斥其餘諸儲
侍神采亦俊奕雕微異鬼工運思倖巧弈昔年翠華床猶留五
雲帟樓頭繪師子雪爪恍相迫綴鈴駭怒晴可以辟鬼疫國家
全盛時此物貢殊譯風雲忽慘淡欬欬話今昔追想頤和游阿
監甚衰瘠流涕道當年威勢何赫赫垂簾女堯舜名聲足薰炙
別苑初興修直士遭譴謫纏頭三百萬不數朝天虢昆明湖水

深民力頗枯腊沈沈樂壽堂象懷及玉簪幾餘騁游睇盛德日
充碩大官營茲場布設窮奧蹟六飛曾一臨慈顏渥且爽何期
口腹累竟受疾疢螫玉魚罷清涼金盃堆狼藉長陵追高皇陽
谷崩簡翟徒餘金棺存無復黃裳褰青娥老阿房淚滿更號咷
一朝宣仁后寂寞安窀穸八表方曹騰電驅兼霆耒猶憑社稷
靈賴以甯廟祐暢觀嵯峨樓千秋嗟只亦逝宜隱魚鹽韜用學
膠鬲下樓餘驚嗟捧心剩撫髀繞途觀獸苑進步頗踖躅攀援
走援攫檻寘藏豺獏鶴步嗤跚跚虎尾駭慙慙斑金麗豹皮抉
籬奮兕觥翔雕失鵬程寶馬露龍骼函蛇頭兩昂繫驥足八隻
隴蜀進鸚鵡湄沱貢鰈鯽重局閉鵠鷗靈根涵虎魄時見羊寢
訛亦看鹿吐豔物趣本天授生理豈外借歸途經籬落爽氣豁
肝膈疏花伴斜曛草際蟲唧嘖辛夷與葳蕤入手香滿搯履聲

驚蚱蜢趯起驟跳躑綠枝望桃園紫蔓緣瓜場慎防蹈棘荆射
影虞虺蜴衣香被華原笑語聞巾幘花枝偏低亞壓髻手屢攔
犖确路轉危微步恒跼踖翩影若游龍洛女賦婉孌行行入林
薄好鳥聲嚙嚙山風吹我襟涼楸爲蕭撼槐柳連枯榆蒼鬱互
屬嶧萬態斂郊垌靜觀知無數炎蒸洗浩蕩風涼怯纖綵錦石
幕蒼苔列坐等茵席不圖越剡景一旦見北貂歸來幽風堂甘
荔指自擘南邦輸佳果沁口騰冰蘂松邊聳石拳望裏肖仙蹠
殘宵儻迷離醉眼定鞭撻可憐松外樹髡枯類翦馘琤琮墜飛
泉噴薄石所阨引水漑池荷時亦有暮汐茲場名農事首宜辨
腴瘠其次飾池宇雕琢及礎礪經營需萬夫斤斧想劃劃規渠
決玉泉導流激湍濤游觀并園藝兩事勿相撾狂生初試眼仰
天笑啞啞慚非班揚才援筆賦五柞序詞貴不紊徵實異摭摭

昔聞顏延之曲水流觴驛右軍宴蘭亭追舌徒嘆惜欲憑山水
氣塵垢謝霑霽詩心味更長橄欖耐斷齏興來聊暢欣興盡罷
喧咋國事蝸觸爭生計鴟鵂嚇紫緋號五鹿旄車專八郤恒流
半飛騰豪儁惜屈躔陳詩宜小恙譜詞合促刺眇懷運覽志踊
躍勵三百鶉首已賜秦民黎何能莫王畿古幽并厥土本鹹潟
培壅命遂人質味冀超羣吾身羨老農把鋤着下袂補屋牽茅
茨築垣假甑甌蠅蛸網虛戶安用糊赤欄春夏勤省耕布種土
宜覩機聲出低牖軋軋亂鳴蠨麥飯煮畦蔬大布作襦襌翻嗟
市井夫馳逐如松颿寄言民生本所貴在耕藉詩成句苦澀險
韻獨餘厝歸鞭指天際雲隙月生魄九衢燈正繁奔車驚迅霹
默園姨丈索近作賦此奉呈用山谷新涼韻

蠟煙如燾幽窗碧秋光破碎燈無色新詩寫就呈高堂咀徵含

商勞襞織知君展卷定一呷笑我蛩蛩亦啾唧可憐沈盡春衫
酒此意瞢騰誰共白神州日夕且顛坼孤注何堪容屢擲君今
姓字滿京華幾見賈生虛前席唯聞匡山好詩卷洗脫鉛華不
能識風流壇坫恐消歇故與騷人生羽翼相逢握手重鄭重長
句槎枒茲請益癡頑賤子百不諳入抱詩篇如拱璧

東芷青

小立能生憶思君髣髴孤霜鐘催葉瘦病骨入秋蘇身在心終
熱時難學愈愚儒冠殊懵懵自喜尙姝姝

九日陪石遺先生天甯寺登高

秋士困俗喧佳節亦憂惱言尋招提境望遠散襟抱放車出煙
郭塵堞沒馳道平林生高風墉陰日色縞浮圖矗雲外峭拔俯
蘭橈寺僧衣破襖蕪碧勤芟埽紺屋雖彫殘猶獲駐麾葆

是日
有達

官落寺

荒臺匿樹罅乘興恣探討連山豁西北瘦嶂天所造幽燕
入搔首市聲來浩浩今年寒事晚衆綠尙娟好毋乃京雒春平
分及秋草嚴霜日夕隕一例就萎槁坐愁節序急朱顏苦難保
蘭臺有詩人携酒登臨早

趙堯生侍御適先至

吾慚秦少章竟伴後山老

安得紅茱萸插頭向晴昊

元旦雪益大醉中作歌再倒疊滄趣樓韻

傾尊臘酒難爲甘振衣看雪南牕南空腸詩思欲透骨此味兀
兀逾醇醪春光九十已去一鏡裏愁見髩毛毳都門除夕久無
雪僕嫗僂指能備談長安今日忽三尺蕩去災沴天所戡頻年
遼海恣鯨鰐邊戶流徙窮披檻吾曹煖飽已倖得况有佳釀過
斗擔茲辰不飲自決棄沈陸難待歲稔三獻春登盤富魚馘何
以佐飲唯雉鷄酒酣肝肺芒角出箕踞抵几吟聲齧兒童拍手

道我醉凍面仰作桃花醅歡場酒夢洌泡電倦眼真欲枯禪參
舉頭西山沒天表但見馬耳沈千嶂觚稜佳氣快一泄遂使青
女來龍潭飛翼凍雨遠莫辨空際變幻同優曇堂堂春夢背人
去此旨唯賸髯蘇諳

晨過正陽門覩鷹隼翔於其顛意矯然也感占一絕

風急雲高鷺鳥翔可憐樓堞尙堂堂金臺不少呼鷹處却抱遺
編賦辨亡

題東野集

石遺先生向我道學詩韓孟可深造海藏稱詩主清覈東野宛
陵置懷抱吾聞歐九譽都官真味橄欖久逾好孟詩豈徒耐咀
嚼精氣陸離射蒼昊貧孟非貧詩自傳新意默默來無邊世兒
鹵莽諂寒瘦冷落仙機織鳳篇

春日雜詩

晨簷集鳴雀啁啾亦相親傷哉叔末夫友生同路人古人篤事
賢攬結苦不周今人獨嫉媚相厄不相謀所以平生交但念馬
少游

燕趙多豪士慷慨能悲歌氣質雖獷粗其心要無它南人號柔
媚讒害伏姁姁噫嘻蜀道艱何如江南路

鄭公萬人傑微鬚目如電征袍挾遼雪襪襪踏京甸壯懷鬱不
試春盡洛陽殿吾師昨邂逅鞭轡駐高宴平生識荆意侍坐遂
一見詩名特餘事健思金百鍊行書如臥虎跳盪老更擅

吾憐趙閱道犯顏勇批鱗朝彈兼圻吏莫効椒房親不聞天聽
迴長受黃門嗔塵封蘭臺勅陳陳徒輪囷

春風翩然來的歷天桃紅斜街招飲啖花氣如熤烘坐中胡侍

御磊落欽古風所見或固偏臣心實至忠勇哉收身歸江水春濛濛

杯罍醑餘春郊原日漸赭艱難惜懽讌節序逐輪輻虛堂發深省毫禿燭復燧讀書本致用末學但搏撻不如作小詩百憂賴寬假堂堂潮陽筆兀傲拜東野

四月八日與梁衆異陪石遺先生崇效寺看牡丹

庭除醑餘春郊原見初夏吾師湖海豪老意崛難下縱轡排風埃提携造蘭若繁花尙蓓蕾顏色閉嬌妖唯欣雙虬臂蒼癭立楸檣挲摩三歎息貞心汝能寫迴車成小讌鬚髮照杯罍相從得伯鸞談吐故淡雅京曹俗漸競此樂衆所舍且持一尊酒起

祝長壽嘏

是日爲
師生

古風二首上弢庵先生用山谷上子瞻韻

渥洼產神駒，矯矯傳食場。籊雲自西極，追影生青光。迴顧天閑侶，芻秣皆清香。金馬爾何如，怒鬣蹲巖廊。昂嘶向蒼昊，何日充乘黃。涼州供苜蓿，千斛甯見嘗。道逢九方歆，騰躍東郊旁。果能空冀羣鞭弭，庸足傷。

孤松當烈風，萬壑含濤聲。交柯蟠龍鳳，盤根結茯苓。千歲化江珠，餌之能引齡。金石乃烈藥，燥發戕厥生。茯苓雖草實，所貴在根蒂。儒生重淵源，豈爲標榜計。東坡與山谷，氣味自相似。

暑雨初成蜀葵乍落循簷得句書寄芷青

焚香消受涼簷雨，此夢深微汝儻同。夢裏繁喧驚蟋蟀，鏡中清影惜梧桐。天心難待烏頭白，世事都成馬耳風。聞說維摩初示病，應憐花雨映階紅。

寄題江叔海觀察新建白亭

殘花何軒軒白亭聞新落江侯吾鄉彥民氣愈瘵瘼盛傳惠聲
洽隼旗蒞河洛出遊實行水勝事寄巘嶸截流見伊闕嵯岈禹
所鑿奔厖赴八灘灘聲尤巉惡石樓聳孤標蘿壁冒天竿昔年
白居易生計此移託沈沈香山寺世網解纏縛因開一藏經香
花秋漠漠千晨閒宿地遺響繫攔鐸咄彼朝士閨黨怨正互搏
青山獨往心處世似孤鶴笠簑邀僧侶雪艇列杯勺灘聲併月
色萬象納淡泊茲亭翼然起檐宇寺相還影堂邇尺只封埴雜
松柞足知公英爽精礪百不鑠益思建亭人襟宇寥哉廓

送陳石遺先生歸里

驕兵墮名城衆志悉潰渙養癰累百載積毒快一旦哀時老詞
客歸淚迸珠彈翩然別秀野秋卉若含惋神州果瓦碎淨土孰
可追聊復臥故山陶江蓀以漫平生思鄉意不共征雁斷由來

騷人厄八九丁離亂等身積詩卷千載足自捍徒令問字人跂踵但嗟嘆

九日

九年京國作重九此度逢秋祇喟悲戡亂頗聞黃素詔湔冤先仆黨人碑帝言罪已寧非調民聽惟天敢謂卑三戶亡秦殷鑒在羣公何以弼清時

九月十一日書事

江漢哀聲輦轂驚讒夫灌灌足傾城初聞鐵豹傳新檄又見盧龍勒變兵就邸倉皇憐濟北託孤涕淚恃東平老臣那有橋山痛緩急相須作阿衡

重過小秀野堂有感

悲烽一夕徧江關垂老詩人掉臂還過客已憐江令宅壞垣能